

09 SEP 2002

PRESIDEN SENEGAL ABDOULAYE WADE LAWAT MALAYSIA MULAI RABU

KUALA LUMPUR, 9 Sept (Bernama) -- Presiden Senegal Abdoulaye Wade akan melakukan lawatan rasmi tiga hari ke Malaysia bermula Rabu ini.

Ini merupakan lawatan pertama bagi Abdoulaye ke Malaysia dan beliau akan diiringi oleh delegasi 30 anggota, menurut menurut satu kenyataan akhbar Wisma Putra di sini, hari ini.

Lawatan presiden itu membuktikan minat Senegal untuk mengembangkan lagi kerjasama dua hala bersama Malaysia.

"Perbincangan antara pemimpin kedua-dua negara akan menumpukan pada kerjasama dua hala, dan juga isu-isu serantau dan antarabangsa yang menjadi kepentingan bersama," katanya.

Abdoulaye akan diberi sambutan rasmi di dataran Parlimen dan akan mengadap Yang di-Pertuan Agong Tuanku Syed Sirajuddin Putra Jamallulail.

Beliau juga akan menghadiri majlis makan malam negara di Istana Negara dan akan mengadakan perbincangan delegasi bersama Perdana Menteri Datuk Seri Dr Mahathir Mohamad di Putrajaya.

Semasa berada di sini, Presiden itu juga akan melawat Unit Perancangan Ekonomi, Proton, Perbadanan Pembangunan Multimedia (MDC) dan Menara Berkembar Petronas.

-- BERNAMA

AT HK PR